

Na osnovu člana 43. stav (4) Zakona o električnoj energiji Federacije Bosne i Hercegovine („Službene novine FBiH“, broj 60/23) Federalni ministar energije, rudarstva i industrije donosi

PRAVILNIK O VOĐENJU REGISTRA ELEKTRANA

POGLAVLJE I. OPŠTE ODREDBE

Član 1.

(Predmet)

Ovim Pravilnikom uređuje se način vođenja Registra svih elektrana na teritoriji Federacije Bosne i Hercegovine (u daljnjem tekstu: Federacija), sadržaj Registra, način upisa, ažuriranja i brisanja iz Registra, način dostavljanja podataka za upis u Registar, potrebni prilozi kao i druga pitanja vezana za vođenje Registra elektrana.

Član 2.

(Definicije)

Izrazi korišteni u ovom Pravilniku imaju značenja koja su utvrđena Zakonom o energiji i regulaciji energetske djelatnosti u Federaciji Bosne i Hercegovine („Službene novine Federacije BiH“ broj 60/23), Zakonom o električnoj energiji Federacije Bosne i Hercegovine („Službene novine Federacije BiH“ broj 60/23), Zakonom o korištenju obnovljivih izvora energije i efikasne kogeneracije („Službene novine Federacije BiH“ broj 82/23).

POGLAVLJE II. REGISTAR ELEKTRANA

Član 3.

(Registar elektrana)

- (1) Registar elektrana predstavlja jedinstvenu evidenciju svih elektrana na teritoriji Federacije BiH, uključujući elektrane za vlastite potrebe aktivnih kupaca.
- (2) Registar elektrana vodi Federalno ministarstvo energije, rudarstva i industrije (u daljnjem tekstu: Ministarstvo) prema Obrascu iz Priloga I ovog Pravilnika.
- (3) Registar elektrana se vodi u elektronskom obliku i ažurira se kontinuirano.
- (4) Registar elektrana je javan i objavljuje se na internet stranici Ministarstva.

Član 4.

(Sadržaj Registra elektrana)

Registar elektrana sadrži sljedeće podatke:

- a) redni broj,
- b) registarski broj,
- c) naziv projekta (elektrane),
- d) datum upisa u Registar elektrana,
- e) poslovno ime ili ime i prezime za fizičko lice,
- f) sjedište ili prebivalište vlasnika elektrane,
- g) lokacija elektrane (kanton, opština ili grad, geografske koordinate),
- h) tip postrojenja,
- i) operator sistema
- j) naponski nivo na mjestu priključenja na mrežu,
- k) instalisana snaga,
- l) odobrena priključna snaga
- m) planirana godišnja proizvodnja energije,
- n) namjena proizvodnje (isporuka u mrežu, za vlastite potrebe ili kombinacija),
- o) vrsta energije koja se proizvodi (električna i/ili toplotna energija),
- p) planirani datum priključenja na mrežu za elektrane u izgradnji,
- q) datum priključenja na mrežu za izgrađene elektrane,
- r) status projekta (elektrana u izgradnji, izgrađena elektrana, nerealizovan projekat).
- s) druge podatke.

Član 5.

(Registarski broj)

(1) Registarski broj predstavlja jedinstveni broj koji se dodjeljuje svakom projektu prilikom upisa u Registar elektrana i sastoji se od sljedećih dijelova:

- a) petocifrenog broja koji predstavlja redoslijed upisa projekta u registar, počevši sa 00001,
- b) slovne oznake koja označava vrstu izvora koji se koristi:
 - H hidroenergija,
 - V energija vjetra,
 - S energija sunca,
 - G geotermalna energija,
 - B bioenergija (biomasa, biogas),
 - M energija mora (valovi, plima i oseka),
 - K elektrane na komunalni otpad,
 - N neobnovljivi izvori energije (ugalj, gas i drugo),
 - O ostali izvori,

- c) slovne oznake koja označava namjenu proizvodnje:
- I isporuka u mrežu,
 - V za vlastite potrebe (bez isporuke u mrežu),
 - K kombinacija (za vlastite potrebe uz povremenu isporuku u mrežu) .
- d) bročane oznake koja označava operatora distributivnog ili prenosnog sistema na čiju je mrežu priključena elektrana
- 1 – Operator distributivnog sistema JP Elektroprivreda BiH d.d. - Sarajevo
 - 2 – Operator distributivnog sistema JP „Elektroprivreda HZ HB“ d.d. Mostar
 - 3 – Operator prenosnog sistema „Elektroprenos BiH“ a.d. Banja Luka.
- e) broja godine upisa u Registar elektrana.

(2) Dijelovi registarskog broja odvajaju se crticom i kosom crtom, tako da registarski broj izgleda kao na primjeru:

Registarski broj: 00001-H-I-3/24

(3) Dodijeljeni registarski broj se ne mijenja i ne može se ponovno koristiti za druge elektrane.

POGLAVLJE III. UPIS I AŽURIRANJE REGISTRA ELEKTRANA

Član 6.

(Upis u Registar elektrana)

(1) Upis u Registar elektrana vrši se:

- a) za elektrane za koje se izdaje energetska dozvola – na osnovu podataka koji su Ministarstvu dostavljeni u ovom postupku,
- b) za elektrane za koje se ne izdaje energetska dozvola – nakon izdavanja elektroenergetskih saglasnosti (distribucijski sistem) ili uslova za priključenje (prenosni sistem), na osnovu podataka koje dostave nadležni operatori sistema.

(2) Nadležni operatori sistema dostavljaju Ministarstvu podatke iz stava (1) tačka b) ovog člana na mjesečnom nivou.

(3) Ministarstvo na zahtjev može izdati potvrdu o upisu u Registar elektrana.

Član 7.

(Ažuriranje Registra elektrana)

(1) Ažuriranje podataka u Registru elektrana vrši se u slučaju:

- a) završetka izgradnje elektrane i priključenja na elektroenergetski sistem,
- b) nerealizacije projekta izgradnje elektrane,
- c) trajnog prestanka rada elektrane,
- d) izmjene podataka o projektu od značaja za vođenje Registra elektrana.

(2) Podatke potrebne za ažuriranje Registra elektrana dostavlja nadležni operator sistema na mjesečnom nivou, za elektrane koje su priključene na mrežu u datom periodu.

(3) Ažuriranje podataka u Registru elektrana može se izvršiti i na zahtjev investitora.

Član 8.

(Nerealizovani projekti)

(1) Elektrani se dodjeljuje status nerealizovanog projekta u slučaju:

- a) kada elektrana nije izgrađena do dana prestanka važenja energetske dozvole, ako je njeno izdavanje obavezno, ili
- b) kada elektrana nije izgrađena do dana prestanka važenja elektroenergetske saglasnosti/uslova za priključenje za elektrane za koje se ne izdaje energetska dozvola, ili
- c) drugih razloga koji dovode do obustavljanja izgradnje elektrane, na osnovu obavještenja investitora.

(2) Podatke o elektranama iz stava (1) tačka b) ovog člana nadležni operator sistema dostavlja Ministarstvu na mjesečnom nivou do uspostavljanja funkcionalnog softvera prozvanog članom 12. ovog Pravilnika. Nakon uspostavljanja funkcionalnog softvera nadležni operator sistema dužan je unositi podatke u registar dok će Ministarstvo isti administrirati.

Član 9.

(Dostavljanje i obrada podataka)

(1) Nadležni operator sistema dostavlja Ministarstvu podatke potrebne za upis u Registar elektrana na obrascu iz Priloga II ovog Pravilnika u pisanom i elektronskom obliku.

(2) Ministarstvo provjerava da li je obrazac za dostavu podataka pravilno popunjen i sadrži li sve podatke.

(3) Ministarstvo može od nadležnog operatora sistema zahtijevati dopunu podataka u slučaju da:

- a) obrazac nije popunjen ili ne sadrži sve propisane podatke,
- b) obrazac nije pravilno popunjen,
- c) je potrebno izvršiti dodatnu provjeru tačnosti dostavljenih podataka.

(4) Nadležni operator sistema dostavlja Ministarstvu podatke potrebne za ažuriranje Registra u formi obavještenja.

(5) Ministarstvo po potrebi može od nadležnog operatora sistema zahtijevati dostavu dodatnih podataka potrebnih za upis i ažuriranje iz Registra elektrana.

(6) Nakon prijema i obrade podataka Ministarstvo vrši upis iz Registra elektrana.

POGLAVLJE IV. ZAVRŠNE ODREDBE

Član 10.

(Ranije započeti ili realizovani projekti)

- (1) Registar elektrana sadrži i podatke o projektima koji su započeti ili realizovani prije dana stupanja na snagu ovog Pravilnika.
- (2) Ministarstvo preuzima podatke iz stava (1) ovog člana iz interne evidencije o izdatim energetske dozvolama te ih ažurira u saradnji sa nadležnim operatorima sistema.
- (3) Nadležni operatori sistema dužni su da sarađuju sa Ministarstvom u procesu izrade Registra elektrana.
- (4) Izuzetno od odredbi člana 5. stav (1) tačka d) za projekte iz stava (1) ovog člana broj godine upisa u Registar elektrana predstavlja godinu izdavanja energetske dozvole za predmetnu elektranu.

Član 11.

(Saradnja)

Nadležni operatori sistema i drugi subjekti u elektroenergetskom sektoru dužni su da sarađuju sa Ministarstvom u procesu vođenja Registra elektrana.

Član 12.

(Softver za vođenje Registra elektrana)

- (1) Ministarstvo će izraditi softver (programski alat) za vođenje Registra elektrana koji sadrži sve podatke propisane ovim Pravilnikom.
- (2) Izuzetno od odredbi člana 9. stav (1) ovog Pravilnika, nakon izrade softvera za vođenje Registra elektrana operatori sistema će dostavljanje podataka vršiti direktnim unosom u softver.
- (3) Ministarstvo vrši kontrolu unosa iz stava (2) ovog člana i odobrava upis projekata u softveru za vođenje Registra elektrana.
- (4) Po izradi softvera, Ministarstvo će obavijestiti operatore sistema i dodijeliti im korisničke naloge sa pristupnim podacima.

Član 13.

(Prilozi uz Pravilnik)

Ovaj Pravilnik sadrži sljedeće priloge koji čine njegov sastavni dio:

- a) Prilog I – Obrazac za vođenje Registra elektrana,
- b) Prilog II – Obrazac za dostavu podataka za upis u Registar elektrana.

Član 14.

(Stupanje na snagu)

Ovaj Pravilnik stupa na snagu narednog dana od dana objavljivanja u "Službenim novinama Federacije BiH".

Broj: 05-30-2-1544/23

19.08.2024. godine

Mostar

MINISTAR

Vedran Lakić

